

南氏文獻錄序

中州士大夫聿來東方固非一姓而惟我肇祖英毅公唐接廉使受封于茲土名振華夷其後分爲三貫曰英陽曰宜寧曰固城千派萬流充滿八域上下千載氏葉炳靈而胄宜寧者最爲繁衍羅麗以前邈矣至于李朝或柱石國家或領袖士林或有孝有忠有道有節祖以傳孫父以傳子叔侄接武昆季并肩冕黻鼎鍾蟬聯奕鴛雖古之王謝賈竇風斯下矣此豈特宜寧氏一派之光幸已乎哉大同栢悅之情自然燹衷之所感發也噫世代旣遠子姓散在各處肥瘠不侔榮枯有殊起於壠畝而處廟堂降於公卿而爲匹夫曷嘗有一定之道哉雖然溯而上之則禪其血受其氣者一而已傳其道世其家者一而已以此觀之萬人而一身千里而一室也可不勉歟文忠公藥泉先生曾孫棲菊堂建源自肇祖以下宜園兩派先輩之懿行盛蹟博蒐廣擣合編二弓藏于巾笥已近二百星霜而至今未行者漏闕英派似欠於圓滿故也菊翁六代孫相泰誠篤追遠慎夫愈久而愈泯將印而公諸世以英派五六位若干追錄未能廣舉者蓋緣力綿而考其實則多少纖悉太不同觀其表則一樣大同也所以題其面曰

南氏文獻錄俾余作開端之語余雖神毫筆萎義何敢辭諸昔范祖禹有言曰
欲學堯舜當法祖宗奚特帝王家爲然哉孟氏又曰堯舜與人同旣欲其法則
非文獻無以爲徵而大抵當時事行散在各書艱於攷閱世紀隨以寢邈易於
放佚其勢固爾更不必多論爲三派後裔者善襲弓箕慕效羹墻則雖千百歲
之下一開卷而恍然如親炙言行可知也風範可想也孝友可慕也文章可見
也然後方可爲述先敦宗而垂芳名於來古矣見今洋瀾橫溢風氣大變凡祖
先之崇德廣業視若弁髦良箴嘉訓歸之土苴爲世道未嘗不慨歎而相泰甫
今日之舉誠善矣美矣顧我桑海餘喘頑如木石而亦粗具彝性者也撫卷長
吁抗顏泚筆以詒于吾宗之僉君子

歲甲寅端陽節英陽後孫炳基謹書